



**BOSNA I HERCEGOVINA
PARLAMENTARNA SKUPŠTINA
BOSNE I HERCEGOVINE
DOM NARODA
Broj:02-011- 1688/'03
Sarajevo, 28.11.2003.god**

ZAPISNIK

**14. sjednice Doma naroda Parlamentarne skupštine Bosne i Hercegovine,
održane 28. i 29. novembra 2003.god.**

Sjednica je počela sa radom u 11,00 sati.

Sjednicom je predsjedavao Mustafa Pamuk, predsjedavajući Doma naroda Parlamentarne skupštine Bosne i Hercegovine.

Na sjednici je bilo prisutno 14 delegata.

Delegat Zoran Sasojević je opravdao izostanak.

Osim delegata na sjednici Doma naroda bili su prisutni: predstavnici Vijeća ministara, predstavnici međunarodnih organizacija, pozvani gosti i predstavnici sredstava javnog informisanja.

Nakon diskusije u kojoj su učestvovali: Hasan Čengić, Mustafa Pamuk, Boško Šiljegović, Goran Milojević, Velimir Jukić i Halid Genjac jednoglasno je usvojen sljedeći dnevni red

D N E V N I R E D

1. Odgovori na delegatska pitanja i delegatska pitanja
2. Usvajanje zapisnika 13. sjednice Doma naroda
3. Prijedlog Zakona o sistemu indirektnog oporezivanja, prvo čitanje – predlagač Vijeće ministara
4. Prijedlog zakona o izmjenama i dopunama Izbornog zakona, prvo čitanje – predlagač Izborna komisija
5. Prijedlog zakona o slobodi vjera i pravnom položaju crkava i vjerskih zajednica Bosne i Hercegovine, prvo čitanje – predlagač Vijeće ministara
6. Prijedlog Zakona o Agenciji za osiguranje u Bosni i Hercegovini, prvo čitanje – predlagač Vijeće ministara
7. Prijedlog zakona o izmjenama i dopunama zakona o državljanstvu BiH, prvo čitanje – predlagač Predstavnički dom
8. Davanje saglasnosti za ratifikaciju Ugovora o slobodnoj trgovini između Vijeća ministara Bosne i Hercegovine i Vlade Republike Moldavije – predlagač Predsjedništvo BiH

9. Davanje saglasnosti za ratifikaciju Međunarodne konvencije o saradnji na bezbjednosti vazdušne plovidbe od 13. decembra 1960. godine sa izmjenama od 6. jula 1970. godine, 21. novembra 1978 godine, 12. februara 1981 i 27. jula 1997. godine i Protokola od 8. oktobra 2003. godine o pristupanju Evropske zajednice «EUROCONTROL-u - predlagač Predsjedništvo BiH
10. Davanje saglasnosti za ratifikaciju kreditnog sporazuma između Bosne i Hercegovine, Centralne banke Bosne i Hercegovine i Evropske zajednice - predlagač Predsjedništvo BiH
11. Imenovanje ombudsmana za ljudska prava Bosne i Hercegovine – predlagač Predsjedništvo BiH
12. Prijedlog Zakona o odbrani Bosne i Hercegovine, prvo čitanje – predlagač Vijeće ministara
13. Prijedlog zakona o izmjenama i dopunama Zakona o ministarstvima i drugim organima uprave Bosne i Hercegovine, prvo čitanje – predlagač Vijeće ministara
14. Prijedlog zakona o izmjenama i dopunama Zakona o Vijeću ministara Bosne i Hercegovine, prvo čitanje – predlagač Vijeće ministara

Ad-1: Odgovori na delegatska pitanja i delegatska pitanja

Odgovor na delegatsko pitanje dobio je delegat Zoran Spasojević.

Delegat Velimir Jukić postavio je sledeća pitanja:

“Zašto Vijeće ministara Bosne i Hercegovine nije dodjelo (izvršilo dodjelu) licencu trećem GSM operatoru i koji su razlozi za to?

Kada će se uraditi?”

U okviru delegatskih pitanja usvojen je prijedlog Mustafe Pamuka da se Vijeću ministara Bosne i Hercegovine uputi tabela sa do sada postavljenim delegatskim pitanjima i dobijenim odgovorima, te da se zahtjeva od Vijeća ministara da dostavi odgovore na pitanja o kojima se do sada nije izjasnilo.

Ad-2: Usvajanje zapisnika 13. sjednice Doma naroda Parlamentarne skupštine BiH

Diskusija nije vođena.

Dom naroda jednoglasno je usvojio Zapisnik 13. sjednice Doma naroda

Ad-3: Prijedlog Zakona o sistemu indirektnog oporezivanja, prvo čitanje – predlagač Vijeće ministara

U diskusiji su učestvovali: Jusuf Kumalić, predstavnik Vijeća ministara, Osman Brka, Vinko Radovanović i Boško Šiljegović.

Dom naroda jednoglasno je usvojio Prijedlog zakona o sistemu indirektnog oporezivanja u prvom čitanju.

Ad-4: Prijedlog zakona o izmjenama i dopunama Izbornog zakona, prvo čitanje – predlagač Izborna komisija

U diskusiji su učestvovali: Ilija Filipović, Velimir Jukić, Jadranko Tomić, Hasan Čengić, Boško Šiljegović, Anto Spajić i Hilmo Neimarlija.

Dom naroda usvojio je u prvom a nakon glasanja jednoglasno i u drugom čitanju Prijedlog zakona o izmjenama i dopunama Izbornog zakona sa sljedećim amandmanima:

Amandman I

Član 1. stav 1. mijenja se i glasi :

« Ako delegat u Domu naroda Parlamentarne skupštine Bosne i Hercegovine istovremeno ima mandat člana Predstavničkog doma Parlamentarne skupštine Bosne i Hercegovine,

Parlamenta Federacije Bosne i Hercegovine, Narodne skupštine Republike Srpske ili kantonalne skupštine, dužan je u roku od 3 dana u pisanom obliku izvjestiti Izbornu komisiju BiH za koji se mandat odlučio, čime mu drugi mandati koje ima prestaju.»

Amandman II

Član 1. stav 2. mijenja se i glasi :

« Ako delegat u Domu naroda Parlamentarne skupštine Bosne i Hercegovine stekne pravo na mandat u Predstavničkom domu Parlamentarne skupštine Bosne i Hercegovine, Predstavničkom domu Parlamenta Federacije Bosne i Hercegovine, Narodnoj skupštini Republike Srpske ili kantonalnoj skupštini u skladu sa članom 9.11. ovog Zakona, a u pisanom obliku u roku od 3 dana izvjestiti Izbornu komisiju o odricanju tog prava, mandat mu neće biti dodjeljen, već će biti dodjeljen slijedećem kvalificiranom kandidatu sa liste iste izborne jedinice u skladu sa stavom 2. člana 9.99. ovog Zakona.»»Ako se nakon upita Izborne komisije, delegat pak odluči za korištenje tog prava, prestaje mu mandat delegata u Domu naroda Parlamentarne skupštine BiH»

Amandman III

Član 2. se mijenja:

U članu 2.5. Izbornog zakona BiH dodaje se stav 4. koji glasi:

«U ad hok komisiji za izbor i imenovanje moraju biti zastupljeni konstitutivni narodi, dva bošnjaka, dva srbina i dva hrvata i jedan iz reda ostalih.»Dosadašnji stavovi 3. 4. 5. postaju 5. 6. 7.

Amandman IV

U članu 2. stav 2. Prijedloga zakona o izmjenama i dopunama Izbornog zakona BiH, u drugoj rečenici riječ “šest” se zamjenjuje sa riječju “sedam” i u trećoj rečenici riječ “dva” se zamjenjuje riječju “tri”.

Kako je Zakon usvojen u različitom tekstu u Predstavničkom domu, formirana je zajednička komisija za postizanje sporazuma o istovjetnom tekstu Zakona. U zajedničku komisiju iz Doma naroda imenovani su: Vinko Radovanović, Velimir Jukić i Halid Genjac.

Ad-5: Prijedlog zakona o slobodi vjera i pravnom položaju crkava i vjerskih zajednica Bosne i Hercegovine, prvo čitanje – predlažak Vijeće ministara

U diskusiji su učestvovali: Ilija Filipović, Hasan Čengić, Tomislav Limov, Hilmo Neimarlija, Boško Šiljegović i Anto Spajić.

Dom naroda jednoglasno je usvojio u prvom i drugom čitanju Prijedlog zakona o slobodi vjera i pravnom položaju crkava i vjerskih zajednica Bosne i Hercegovine uz sljedeće amandmane:

Amandmani Ustavno-pravne komisije su:

Amandman I

U članu 4. tačka 1. na kraju teksta briše se tačka, stavlja se zarez i dodaje tekst: “kao i na višim nivoima obrazovanja, što će se regulisati posebnim propisima”

Amandman II

U članu 4. dodaje se novi stav 3. koji glasi: “Crkve i Vjerske zajednice ne smiju djelovati svojim sadržajem i načinom obavljanja vjerskih obreda i drugih očitovanja vjere koji su protivni pravnom poretku, javnoj sigurnosti, moralu ili na štetu života i zdravlja, odnosno na štetu prava i sloboda drugih”

Amandman III

Iza tačke f) u stavu 2. člana 5. dodaje se nova tačka g) koja glasi: “Zabranjuje se izazivanje, podržavanje, ili pozivanje na vjersku mržnju i netrpeljivost

Amandman V

U članu 5. tačka 3. se briše.

Amandman VI

U stavu 1. člana 7. iza riječi “ravnati” dodaju se riječi: “s time da ne ugrožava slobodu drugih”

Amandman VII

U članu 8. stav 2. u trećoj rečenici iza riječi Hercegovini, briše se tačka i stavlja zarez te dodaju riječi “u skladu sa vjerskim propisima i unutarašnjoj organizaciji u”

Amandman VIII

U članu 13. dodaje se nova tačka 4. koja glasi: “Država se obavezuje regulisati penziono, invalidsko i zdravstveno osiguranje vjerskih službenika, posebnim propisom, a na poticaj bilo koje institucije iz člana 15. tačke 1. ovog Zakona.”

Amandman IX

Stav 1. člana 15. mijenja se i glasi: “Pitanja od zajedničkog interesa za Bosnu i Hercegovinu i oba entiteta s jedne i neku ili više crkava i vjerskih zajednica s druge strane mogu se uređivati i sporazumom koji zaključi Predsjedništvu BiH, Vijeće ministara BiH, vlade entiteta i Crkva, odnosno Vjerska zajednica.”

Amandman X

Član 16. tačka 3. mijenja se i glasi: “Crkve i vjerske zajednice odnosno pravne osobe unutar njih iz člana 8. stava 2.,5. i 6. u prijavi za upis u registar daju sljedeće podatke:

O nazivu pravne osobe;

O sjedištu pravne osobe;

O službi osobe ovlaštene za zastupanje pravne osobe;

O pečatu i štambilju, koje u svom djelovanju koristi pravna osoba.”

Amandman XI

U članu 18. iza tačke 4. dodaje se nova tačka 5. koja glasi: “Ministarstvo može odbiti zahtjev za registraciju samo ako ocjeni da su sadržaj i način obavljanja vjerskih obreda i drugih očitovanja vjere protivni pravnom poretku, javnom moralu ili štete životu i zdravlju ili drugim pravima i slobodama vjernika i građana.”

Tačke 5.,6. i 7. postaju tačke 6.,7. i 8.

Amandman XII

Član 20. se briše.

Amandman XIII

Član 21. se briše.

Amandman usvojen na sjednici Doma u drugom čitanju:**Amandman IV**

U članu 5. tačka 2.f) iza riječi: »briše se tačka, stavlja se zarez i dodaje tekst:

«niti postojeće takve udruge, osnovane bez mjerodavne crkvene vlasti, mogu postojati bez mjerodavna odobrenja.»

Dom naroda je usvojio sljedeći zaključak:

«Zadužuje se Vijeće ministara da kao predlagač pokrene inicijativu o izmjenama i dopunama ovoga Zakona kako bi se došlo do poboljšanja teksta Zakona kao i samog naziva Zakona»

Kako je Zakon usvojen u različitom tekstu u Predstavničkom domu, formirana je zajednička komisija za postizanje sporazuma o istovjetnom tekstu Zakona. U zajedničku komisiju iz Doma naroda imenovani su: Nade Radović, Ilija Filipović i Hilmo Neimarlija.

Ad-6: Prijedlog Zakona o Agenciji za osiguranje u Bosni i Hercegovini, prvo čitanje – predlagač Vijeće ministara

U diskusiji su učestvovali: Jadranko Tomić, Halid Genjac, Goran Milojević, Anto Spajić
Dom naroda je usvojio u prvom i drugom čitanju Prijedlog Zakona o Agenciji za osiguranje u Bosni i Hercegovini sa sljedećim amandmanom koji je usvojen na samoj sjednici:

Amandman I

U članu 3. stav 2. mijenja se i glasi:

«Sjedište Agencije je u Banjaluci»

Kako je Zakon usvojen u različitom tekstu u Predstavničkom domu, formirana je zajednička komisija za postizanje sporazuma o istovjetnom tekstu Zakona. U zajedničku komisiju iz Doma naroda imenovani su: Zoran Spasojević, Velimir Jukić i Osman Brka-

Ad-7: Prijedlog zakona o izmjenama i dopunama zakona o državljanstvu BiH, prvo čitanje – predlagač Predstavnički dom

U diskusiji su učestvovali: Ilija Filipović, Boško Šiljegović, Halid Genjac i Osman Brka
Dom naroda nije usvojio Prijedlog zakona o izmjenama i dopunama zakona o državljanstvu Bosne i Hercegovine čiji je predlagač Predstavnički dom.

Ad-8: Davanje saglasnosti za ratifikaciju Ugovora o slobodnoj trgovini između Vijeća ministara Bosne i Hercegovine i Vlade Republike Moldavije – predlagač Predsjedništvo BiH

U diskusiji je sudjelovao Hasan Čengić.

Dom naroda jednoglasno je dao saglasnost za ratifikaciju Ugovora o slobodnoj trgovini između Vijeća ministara Bosne i Hercegovine i Vlade Republike Moldavije.

Ad-9: Davanje saglasnosti za ratifikaciju Međunarodne konvencije o saradnji na bezbjednosti vazdušne plovidbe od 13. decembra 1960. godine sa izmjenama od 6. jula 1970. godine, 21. novembra 1978 godine, 12. februara 1981 i 27. jula 1997. godine i Protokola od 8. oktobra 2003. godine o pristupanju Evropske zajednice «EUROCONTROL-u - predlagač Predsjedništvo BiH

U diskusiji je sudjelovao Hasan Čengić.

Dom naroda jednoglasno je dao saglasnosti za ratifikaciju Međunarodne konvencije o saradnji na bezbjednosti vazdušne plovidbe od 13. decembra 1960. godine sa izmjenama od 6. jula 1970. godine, 21. novembra 1978 godine, 12. februara 1981 i 27. jula 1997. godine i Protokola od 8. oktobra 2003. godine o pristupanju Evropske zajednice «EUROCONTROL-u

Ad-10: Davanje saglasnosti za ratifikaciju kreditnog sporazuma između Bosne i Hercegovine, Centralne banke Bosne i Hercegovine i Evropske zajednice - predlagač Predsjedništvo BiH

Diskusija nije vođena.

Dom naroda jednoglasno je dao saglasnost za ratifikaciju kreditnog sporazuma između Bosne i Hercegovine, Centralne banke Bosne i Hercegovine i Evropske zajednice.

Ad-11: Imenovanje ombudsmana za ljudska prava Bosne i Hercegovine – predlagač Predsjedništvo BiH

Diskusija nije vođena.

Dom naroda je imenovao Snježanu Savić, Mariofila Ljubića i Safeta Pašića za ombudsmane za ljudska prava Bosne i Hercegovine.

Dom naroda je nakon pauze u 16,50 sati prekinuo rad sjednice

Sjednica je počela sa radom u 11,10 sati.

Na nastavku sjednice bilo je prisutno 14 delegata.

Delegat Zoran Sasojević je opravdao izostanak.

Osim delegata na sjednici Doma naroda prisustvovali su: predstavnici Vijeća ministara, predstavnici međunarodnih organizacija, pozvani gosti i predstavnici sredstava javnog informisanja.

Ad-12: Prijedlog Zakona o odbrani Bosne i Hercegovine, prvo čitanje – predlagač Vijeće ministara

U diskusiji su učestvovali: Boško Šiljegović, Ilija Filipović, Halid Genjac, Branko Zrno, Goran Milojević, Hasan Čengić, Tomislav Limov

Prijedlog zakona o odbrani je usvojen sa devet amandmana Ustavno-pravne komisije Doma naroda, kao i sa dva amandmana koji su usvojeni na samoj sjednici Doma u drugom čitanju.

Amandmani Ustavno-pravne komisije su:

Amandman I

U preambuli Prijedloga zakona o odbrani, u prvoj rečenici iza riječi “člana” dodaje se “III.5.a)”.

Amandman II

Iza člana 13. Nacrta zakona u naslovu “C” riječ “Ministar” se briše, a umjesto nje stavlja se riječ “Ministarstvo”, pa je naslov “C. Ministarstvo obrane Bosne i Hercegovine”.

Amandman III

Nakon člana 13. dolazi novi član 14. koji glasi:

“Ministarstvo odbrane Bosne i Hercegovine mjerodavno je za:

- stvaranje i održavanje odbrambenog kapaciteta kako bi se osigurala zaštita suvereniteta, teritorijalnog integriteta, političke nezavisnosti i međunarodnog subjektiviteta Bosne i Hercegovine,
- predstavljanje Bosne i Hercegovine u međunarodnom odnosima vezanim za pitanje odbrane,
- nadzor nad svim subjektima Oružanih snaga Bosne i Hercegovine,
- izradu, pregled i ažuriranje obrambene politike Bosne i Hercegovine koju odobrava Predsjedništvo Bosne i Hercegovine, a usvaja Parlamentarna skupština Bosne i Hercegovine,
- izradu i odobravanje politika i propisa glede ustrojstva, administracije, obuke, opremanja i uporabe Oružanih snaga Bosne i Hercegovine,
- osiguravanje da Bosna i Hercegovina poštuje međunarodne obveze vezane za pitanja odbrane,
- aktiviranje postrojbi pričuvnog sastava za sve operacije, izuzev planirane obuke,

- razmještaj ili uporabu bilo kojeg dijela Oružanih snaga izvan Bosne i Hercegovine za sve operacije ili aktivnosti obuke,
- izdavanje instrukcija Načelniku Zajedničkog stožera Bosne i Hercegovine za uporabu ili razmještanje postrojbi Oružanih snaga unutar Bosne i Hercegovine za potrebe koje nisu obuka,
- uspostavu postupka za odobravanje vojne pomoći civilnim vlastima u slučaju prirodnih katastrofa i nesreća, po ovlastima datim od strane Predsjedništva Bosne i Hercegovine,
- ustanovljavanje postupaka koji osiguravaju razvidnost funkcija Ministarstva obrane Bosne i Hercegovine i
- ostale mjerodavnosti definirane u Zakonu “.

Amandman IV

Član 20. u cjelosti postaje član 14. Nacrt zakona.

Amandman V

Iz člana 14. dolazi naslov “D. Ministar odbrane Bosne i Hercegovine”.

Amandman VI

Tekst člana 49. Nacrta zakona u cjelosti se briše i umjesto njega stoji novi tekst istog člana: “Entiteti će provoditi jedinstvenu politiku služenja vojnog roka koju donosi ministar odbrane BiH na temelju zakona koji donosi Parlamentarna skupština Bosne i Hercegovine”.

Amandman VII

U članu 49. dodaje se novi stav 2. koji glasi:

“Regruti državljani odgovarajućeg entiteta služe vojni rok u pravilu u vojsci svoga entiteta”

Amandman VIII

U članu 70. dodaje se novi stav 2. koji glasi:

“Odredbe iz stava 1. ovog člana ne odnose se na oficire sa bilo kojim činom koji su u profesionalnu vojnu službu vojski entiteta stupili do dana stupanja na snagu ovog zakona.”

Amandman IX

Iza člana 78. Nacrta zakona dolazi novi član čiji tekst glasi:

“Parlamentarna skupština Bosne i Hercegovine, Vijeće ministara, Predsjedništvo BiH, entitetski parlamenti Vlade, te svi subjekti odbrane na nivou entiteta i države će, u okviru vlastite ustavne i zakonske mjerodavnosti, provesti potrebite aktivnosti, kako bi od početka primjene ovog Zakona do kraja tranzicijskog razdoblja, bili ispunjeni uslovi za prijem Bosne i Hercegovine u članstvo NATO Saveza”.

Amandmani usvojeni na sjednici Doma u drugom čitanju:

Amandman X

Član 12. mijenja se i glasi:

"Predsjedništvo BiH (u daljem tekstu Predsjedništvo), djelujući prema konsenzusu, vrši vrhovnu, operativnu i administrativnu komandu i kontrolu Oružanih snaga Bosne i Hercegovine."

Amandman XI

Član 14. prvi stav mijenja se glasi:

"Ministar odbrane Bosne i Hercegovine (U daljem tekstu Ministar) ima sljedeće organizacione i administrativne nadležnosti koje su predmet Vrhovne komande i kontrole Predsjedništva."

Ostali dio teksta ostaje nepromijenjen.

Ad-13: Prijedlog zakona o izmjenama i dopunama Zakona o ministarstvima i drugim organima uprave Bosne i Hercegovine, prvo čitanje – predlagač Vijeće ministara

U diskusija nije vođena.

Prijedlog zakona o izmjenama i dopunama Zakona o ministarstvima i drugim organima uprave Bosne i Hercegovine usvojen je u Domu naroda Parlamentarne skupštine BiH u tekstu kakav je došao u parlamentarnu proceduru od strane predlagača Vijeća ministara BiH.

Ad-14: Prijedlog zakona o izmjenama i dopunama Zakona o Vijeću ministara Bosne i Hercegovine, prvo čitanje – predlagač Vijeće ministara

U diskusiji su učestvovali: Velimir Jukić, Boško Šiljegović i Mustafa Pamuk

Dom naroda usvojio je u istovjetnom tekstu kao i Predstavnički dom Zakon sa jednim amandmanom koji glasi:

Amandman I

U članu 3. Prijedlog zakona o izmjenama i dopunama Zakona o Vijeću ministara Bosne i Hercegovine, riječi na početku člana 46 a): « Do uspostve novog saziva Vijeća ministara, poslije održanih narednih općih izbora i isteka mandata članovima Vijeća ministara « mjenjaju se riječima: « U roku od godinu dana od dana stupanja na snagu ovog zakona.»

Sjednica je završena 12,50 sati.

Sastavni dio ovog zapisnika je neautorizirani transkript sjednice.

SEKRETAR
DOMA NARODA
Jadranko Tomić

PREDSJEDAVAJUĆI
DOMA NARODA
Mustafa Pamuk